



Inatsisartunut ilaasortaq Pele Broberg, Partii Naleraq
Inatsisartut Allattoqarfiat
/ MAANI

Kalaallit Airports siulersuisullu akissarsiaat pillugit § 37 naapertorlugu apeqummut nr. 2019/31-mut akissutit.

24-01-2019
Suliap nr. 2019 - 1361
Allakkat nr. 9318566

Asasara Pele Broberg,

Postboks 1015
3900 Nuuk

Kalaallit Airports A/S aamma siulersuisut akissarsiaat pillugit Inatsisartut suleriaasianni § 37 naapertorlugu Naalakkersuisunut apeqquaqateqarputit. Apeqqutigisatit uannit akisassanngortinneqarsimapput.

Oqarasuaat (+299) 34 50 00
Fax (+299) 32 50 02
e-mail: govsec@nanoq.gl
www.naalakkersuisut.gl

Apeqqutigineqartut ima oqaasertaqarput:

1. Naalakkersuisut siulittaasuata Kim Kielsen-ip aqqani, Namminersorlutik Oqartussat tamakkiisumik amerlanerussuteqartumillu ingerlatsiviit pigisaanni, siulersuisoqarnerannut aqutsivik akisussaaffigisaattut inissisimava?

Akissut:

Uppernarsarsinnaavara siulersuisoqarnermut aqutsivik (Ingerlatseqatigiiffinnut Allattoqarfik) Naalakkersuisut Siulittaasuata Naalakkersuisoqarfiani immikkoortortaammat uanga akisussaaffimma ilagimmassuk.

2. Naalakkersuisut siulittaasuata Kalaallit Airports A/S pillugu, ulloq 25. Juli 2018, immikkut ittumik ataatsimeersuartitsisimanini qulakkeersinnaavaa, tassanilu Naalakkersuisut siulittaasuut immikkut ittumik ataatsimeersuartitsinermi siulersuisut akissarsiaasa qaffannissaat siunertatuarisimaneranut qulakkeerinnissinnaava?

Taamaangippat oqaluuserineqarsimasut nuisanngitsut saqqummiunneqarnissaannut peqqussuteqarpunga.

Akissut:

Ulloq 25. juli 2018 Kalaallit Airports A/S pillugu immikkut ittumik ataatsimeersuartoqarpoq, tassani oqaluuserisassat marluullutik. Oqaluuserisassaq siulleq tassaasimavoq ataatsimeersuarnermi aqutsisussamik toqqaanissaq. Oqaluuserisassat appaat tassaasimalluni siulersuisuni siulittaasup siulersuisunilu ilaasortat allat akissarsiassaannik aalajangersaanissaq.

3. Naalackersuisut Kalaallit Airports A/S pillugu, ulloq 25. Juli 2018, immikkut ittumik ataatsimeersuartitsinerminni suna patsisigalugu siulersuisunut akissarsiarititaasut qaffariangaatsiarpaat, ilaatigut siulersuisuni siulittaasuusoq ukiumut toqqaannaq 750.000 kroner akissarsiaritinneqalersimaneranut suna patsisaava?

Akissut:

Naalackersuisut tigussaasumik naliliisimaneq tunngavigalugu Kalaallit Airports A/S-imi siulersuisut siulittaasuata akissarsiai qaffanniarlugit aalajangersimapput. Naatsorsuutigineqarpoq siulersuisut siulittaasuat aningaasalersuinissamik sanaartornissamillu suliaqarnermini ingerlatseqatigiiffiit siulersuisuini siulittaasut nalinginnaasumik suliaqartarnerannit suliaqangaatsiarnerussasoq, tassunga ilanngullugu timmisartoqarfiit sanaartorneqartussat aamma Kalaallit Airports A/S-imit ingerlanneqartussat aningaasalersorneqarnissaannik immikkut ittumik suliaqarnermini.

4. Immikkut ittumik ataatsimeersuarsimaneq massakkuusumi ulloq 14. Januar 2019 suli Kalaallit Airports A/S-ip nittartagaani - www.kair.gl - aatsaat dansk-isuinnaq isersimagaanni nutaarsiassaannartut takuneqarsinnaavoq. Kalaallisut, oqaatsilluunniit allat atorlugit, isersimagaanni tamanna takuneqarsinnaanngilaq. Tamanna ataatsimeersuarnermiit imaqarniliaq allatigut saqqummiunneqarnikuua, pisortatigoortumillu oqaatsit atorlugit saqqummiunneqarnikuua? Taamaappat qanoq, sukut, qaqugukkullu uppernarsarnissaannut Naalackersuisut peqquneqarput.

Akissut:

Ingerlatseqatigiiffinni Naalackersuisunit tamakkiisumik ilaannakortumilluunniit pigineqartuni ataatsimeersuarsimanermit atortunik Naalackersuisut tamanut saqqummiussisannngillat siammarterisaratillu. Tamanna ingerlatseqatigiiffinnut tunngatillugu inatsimmi aalajangersakkat naapertorlugit ingerlatseqatigiiffiit namminneq isumagisarpaat. Tamanna tunngavigalugu apequtigineqartumut allanik ilanngussassaqaanngilanga.

5. Naalackersuisut siulersuisoqarnermut akissarsiasanun politikkaa ukioq 2014-imeersoq malillugu, suliffeqarfiit aningaasatigut kaaviiartitaat najoqqutaralugu annersaasut - tassani Royal Greenland A/S takutinneqarpoq - siulersuisuni siulittaasorisaaq ukiumut 500.000 kroner akissarsiarisartussaavai. Suna patsisigalugu Naalackersuisut namminneq politikkeritik avaqqullugu Kalaallit Airports A/S-imi siulersuisuinut akissarsiat qaffariasaarpaat?

Akissut:

Akissutitut apeqquit pingajuannut akissutigisara innersuussuutigaaara.

6. Naalakkersuisut eqqartukkami politikkertik malissimangippassuk, naak Naalakkersuisut pisortatigoortumik nittartagaanni suli nuisasoq - www.nanoq.gl - suut allat politikkerisatik imaluunniit ileqqorisassatut malinniarnikuusatik massakkut malinngilaat imaluunniit malinnianngilaat, taavalu Naalakkersuisut politikkilioriarlutik, arlaannilluunniit maleruagassamik inisseeriarlutik, malinnginnissaannut allatut ilionnissaq pissusissamisoortutut isigaat?

Akissut:

Naalakkersuisut ingerlatseqatigiiffinni Namminersorlutik Oqartussat pigisaanni siulersuisut aningaasarsiassaannik aalajangiinermi akissarsiaqartitsinermit malitassat atuuttut tunngavigisarpaat. Isumaqarpunga Kalaallit Airports A/S-imi siulersuisuni ilaasortat akissarsiaassaasa aalajangersarneqarneranni aalajangiisimanerit akissarsiaqartitsinermit malitassani inassuteqaatinut Naalakkersuisut nittartagaanni takuneqarsinnaasunut akerliunngitsut taamaammallu atuuttut.

Apeqqutigineqartumut allanik ilanngussassaqaanngilanga.

7. Naalakkersuisut malillugit, Naalakkersuisoqarfinni imaluunniit ingerlatsivinni allani Naalakkersuisut aqqaniittuni politik periuseq inissineqareertoq malineqartinnagu qanoq kinguneqartitsinissamik periuseqarpat?

Kinguneqartitsisarniarunik periuserisaq taakkartorneqaqquvoq.

Akissut:

Assersuutigalugu malitassatut aalajangersakkat avaqqunneqarnissaannut qanoq iliortoqartarnissaa nalinginnaasumik nalunaarutigineqarsinnaanngilaq siumoortumillu oqaatigineqarsinnaanani. Taamatuttaaq malittarisassanik atuuttunik inatsisinillu atuuttunik malinnittoqannginnerani qanoq qisuariartoqartarnissaa nalinginnaasumik nalunaarutigineqarsinnaanngilaq siumoortumillu oqaatigineqarsinnaanani. Pineqartut taakku atuutsillugit pisoq aalajangersimasoq pissutsillu aalajangersimasut tunngavigalugit nalilersuisoqassaaq iliuseqartoqarluniluunniit.

Apeqqutigineqartumut allanik ilanngussassaqaanngilanga.

8. Naalakkersuisut qanoq oqartussaaffigisami siulersuisut akissarsiaqartinnissaannut pilersaaruteqarpat?

Naalakkersuisut pilersaaruteqarsimappata qinnuigissavakka ingerlatsiviit ataasiakkaarlugit immikkut akissarsianut pilersaarutaannik nassuiaanneqassasut.

Akissut:


Naalakkersuisut aalajangiinikuunngillat ingerlatseqatigiiffinni siulersuisut akissarsiassaannik atuuttunik allanngortitsisussanik. Aamma ingerlatseqatigiiffiit nalinginnaasumik ataatsimeersuarneranni aktiatigut ingerlatseqatigiiffinni ilaasortat akissarsiassaat isummerfigineqartarput. Tamatuma saniatigut immikkut ittumik ataatsimeersuortoqarnerani assersuutigalugu siulersuisuni ilaasortat akissarsiaasa ataatsimeersuarnermilu sammisassat allat allanngortinneqarnissaat aalajangiiffigineqarsinnaapput.

9. Namminersorlutik Oqartussat tamakkiisumik annertunerusumilluunniit pigisaanni, ingerlatsivimmi sorlermi siulersuisuni siulittaasuusooq toqqaannaq akissarsiaqarnerosatut inissisimava?

Akissut:

Maannakkorpiaq akissarsiaqarnerpaaq tassaavoq Kalaallit Airports A/S-imi siulersuisut siulittaasuat, taanna 750.000 kr.-nik akissarsiaqartinneqarpoq. Aamma apeqqutit pingajuannut akissutigisara innersuussutigaa.

Inussiarnersumik inuulluaqqusillunga



Kim Kielsen